

PERSUNGAS

Premi per Patricia Scarpatetti

«Ella ò ple tgi angl ademplia igls criteris»



Igls genitours, la purtadra digl premi, sia sora ed igl laudator. (da san.) Luisa Scarpatetti, Patricia Scarpatetti, Pauli Scarpatetti, Nicole Scarpatetti e Thomas Borer.

● **G.N.S.** An en rom festiv ò Patricia Scarpatetti retschet a Turitg en premi, tgi vign surdo siva digl 1998 mintga dus onns a persungas u instituziuns tgi s'angaschan segl camp umanitar. Surdo vign igl premi, «Jonas Furrer Preis», doto cun 10 000 francs dad ena loscha tgi reunescha signours pi bagnstants.

La lavour da Patricia Scarpatetti da Cunter a favour digls unfants sainza datgesa aint igl martgea da San Pedro Sula an Honduras è exemplarica ed instancabla. Sia veta, sies mond e sies cor èn igls unfants tgi canoschan strusch l'amour da mamma e bab e tgi èn schizont lipos digls genitours perveia da violenza e mancanza da nutrimaint. Gist chella privadientscha e tgira tgi mantga ad els, porscha Patricia Scarpatetti agls 42 unfants aint igl asil d'unfants «Yo quiero ser...», a San Pedro Sula. Cun en milliun abitants è San Pedro Sula igl sagond grond martgea an Honduras e cunzont igl martgea cun la pi gronda criminalitad. Prest diesch onns veiva la donna da 33 onns per chels unfants tgi on adegna puspe vasia alla povradad an fatscha. Graztga agl grond angaschamaint da Patricia Scarpatetti ed a tot las persungas tgi èn adegna puspe sa mussadas fitg generosas, ègl pussebel da porscher a 42 mattas

e mats da 12 meis anfignen 17 onns, en datgesa noua tgi els retschevan betg angal bler amour, mabagn er en li noua tgi els èn schurmageas da criminalitad ed anc bler oter. Dalla missiun seriosa da Patricia Scarpatetti ò er santia la Fundaziun «Jonas Furrer-Preis», tgi surdat siva digl 1998 mintga dus onns en premi a persungas u ad instituziuns tgi s'angaschan per projects umanitars.

Betg sto simpel da sa decider

Parsoura dalla Fundaziun «Jonas Furrer-Preis» è Hans Bühler, egn da chels 800 framassungs (Freimaurer) tgi appartignan alla loscha «Modestia cum Libertate». I seia ansomma betg sto schi simpel a tge project dar igl premi 2014 cun aveir tots projects inoltros ple tgi angal ademplia igls criteris tgi dovra per retschever igl premi doto cun 10 000 francs. Ena misergia, tgi seia ple tgi angal petra, seia per Patricia Scarpatetti prest mintga de realitad e percheigl ins vegia decida da surdar ad ella igl premi 2014, ò detg Hans Bühler. Da redutgier la misergia cun chel premi seia bagn betg pussebel, dantant duess igl sustign finanziar tuttegn pussibilitar a Patricia Scarpatetti ed a sies 12 collaboratours digl asil d'unfants «Yo quiero ser...», da porscher agls 42 unfants ena migra qualitat da veiver.

Igl davos pled

ò gia igl president d'onour

Tignia la laudatio ò Thomas Borer, igl anteriour ambassadour svizzer a Berlin. El ò detg, tgi igl premi vigna surdo a persungas tgi mosan respect e toleranza anvers igl individi, tgi sa mossan solidaricas anvers igls povers e tgi s'angaschan per ena veta an dignitad umana. Tots chels aspects ins dastga er attribueir a Patricia Scarpatetti ed a sies angaschi grondious, ò menziuno igl anteriour diplomat. Dantant tgi an Svizra ins vigna adegna pi manevell alla adualitad, seia betg previa ainten la societad da Honduras en post per igls unfants dalla veia. Bruno Fellingner, igl president d'o-

nour dalla Fundaziun «Jonas Furrer-Preis», en om da passa 90 onns, è sto schi commueto dalla lavour da Patricia Scarpatetti, tgi el ò gist segl li decida d'augmentar la somma digl premi da 10 000 francs per 5 000 francs. Siva tgi Hans Bühler ò surdo igl premi a Patricia Scarpatetti è la societad illustra, cun blera prominenz politica da Turitg, sa dulzada dalle soptgas per applaudar e chegl per en lung taimp.

Pleds cordials e simpatics

Ple tgi angal commuentada è alloura er stada la purtadra digl premi. Per ella seia en grond privilegi da pudeir spindrar unfants e dar ad els l'amour tgi maretan. Patricia Scarpatetti ò detg tgi pussibilito da realisar chel project vegian fitg bleras persungas generosas, vigl e gioven tgi vegia managea bagn cun ella, instituziuns ed organizaziuns generosas ed alloura betg igl davos igls sies genitours Luisa e Pauli Scarpatetti, tgi seian stoss en grond sustign mental an tots chels onns. Angraztgea ò Patricia Scarpatetti er an nom digls 42 unfants e managea tgi lour fatschas cuntaintas conferman igl pi bagn tots chels sustigns pi pitschens e pi gronds tgi ella vegia gia l'onour da retschever igls davos diesch onns. Igls 15 000 francs retschets sonda passada a Turitg vignan investos ainten ena nova cuschna digl asil d'unfants «Yo quiero ser...», ò detg Patricia Scarpatetti.



Dus persungas tgi on er gronds maretz tgi la Surmirana ò retschet igl premi èn Peter R. e Greta Hofmann-Sonder.